



UKA2019/Imm. 59, 128 & 134

8. oktober 2019

Aqqa Samuelson

Siunnersuuteqartunut Inuit Ataqatigiit qujapput. Immikkoortunut 59-imut, 128-mut taavalu 134-mut imatut oqaaseqaateqassaagut:

Siunnersuutit tamarmik immikkut pingaaruteqarluinnartuummata, siunnersuuteqartullu suliaqarsimanerat ataqqillugu immikkut oqaaseqarfigissavagut.

Imm. 128. Annerpaamik 0,2 procentimik THC-mik akulinnik cvannabisimik nioqqutissat (tassani cannabisolia aamma eqqarsaatigalugu) inerteqqutaajunnaarsinnissaannik Naalackersuisut suliniuteqaqqullugit Inatsisartut aaliajangiiffigisassaattut siunnersuut.

(Inatsisartunut ilaasortaq, Peter Olsen, Inuit Ataqatigiit)

Inuit Ataqatigiit Peter Olsenimut siunnersuutaanullu pingaarutilimmut qujapput.

Siunnersuut pisariaqarluinnartutut isigisariaqarpoq. Inuit Ataqatigiit nunatsinni peqqisumik inuuneqarnissaq pingaartillugu, ulluinnarni tarnimikkut timimikkullu anniaateqartortavut eqqarsaatigalugit cannabisoliep anniarnaveersaatit atugaalernissaa ammanerusumillu pissarsiarineqarsinnaasunngortinnissaa nangittumik sulissutigissavaat. Tamannami cannabisoliep anniarnaveersaatit atornissaa pillugu Inuit Ataqatigiit qinigaaffimmi ukiuni siuliani angusaqarluarsimavugut. Anguniagaavoq inuiaqatigiinni nalinginnaasumik inuunerup pitsaassusaata qaffassarnissaa, inuiaqatigiit inuiattut inerikkiartornerannut peqataasinnaasut tamaasa pisariaqartikkatsigik. Tamatumani sanngiinnerusut, soorlu tarnimikkut timimikkullu anniaatillit nappaatillillu immikkut eqeersimaarfiginissaat pingaartuuvoq. Taamatut oqaaseqarluta siunnersuutip aappassaaneerreqannginnerani Ataatsimiititaliamut susassaartumut ingerlateqqinneqarnissaa innersuupparput.

Inuit aalajangersimasumik aamma immikkuullarilluinnartumik nappaatillit nunatsinni peqqinnissaqarfiup tungaaniit ikiorserasuarneqarnissaminnik periarfissaalatsisarnerat aaqqiiviginiarlugu Naalackersuinikkut suliniuteqartoqarnissaa pisariaqalivippoq. Inuppassuit immikkuullarissumik timimikkut tarnimikku anniaatillit, qaqutigooortumillu nappaateqartut peqqinnissaqarfimmi suleriaatsip pitsaasumik sullissinermikkut matussusersinnaasangikkaat tamanit naluneqanngilaq. Taamaattumik 0,2 procentimik THC-mik akulinnik cannabisimik nioqqutissat nunatsinni inerteqqutaajunnaarsinnissaannut Naalackersuisut pisussaaffilerneqartariaqarput. Naalackersersuit pisussaaffik tamaat tigullugu nunatsinni innuttaasut pillugit cannabisolienimik 0,2%-imik THC-talinnik pisisinnaalernissaat

INUIT ATAQATIGIIT

Inatsisartuni



ammaanneqartariaqarpoq. Nunatsinni innuttaasut peqqissutsikkut isumassortariaqartut ullumikkornit pitsaanerusumik imminnut ikiorsersinnaanissaminnut periarfissaqartinneqartariaqarput.

Misissuinerit inernerisa takutippaat CBD-mik napparsimajunnaarsitsisinnaaneranik iluaqutaasinnaaneranillu ilisimatusarneq ukiuni makkunani ingerlavoq. Siunnersuuteqartup tunngavilersuutigisamini CBD ilaatigut marniliornermik aseruuttoornermik, merianngunermut, ernumanermik/isummakkullu nanertisimanermik nappaateqarnermut, qasusoornermut, gigitmut nappaassuarmullu kræftimut iluaquusiisartoq erseqqissaatigaa. Taamaattumik innuttaasut napparsimanermik anniaammillu eqqugaasut oqariartuutigisaat paasigaanni oqariartuut ataasiusoq tusaaneqartariaqarpoq: Cannabisolie 0,2 procentimik THC-talik nunatsinni ajornannginnerusumik pissarsiarineqarsinnaalertariaqarpoq. Taamaattumik siunnersuuteqartup tunngavilersuutai toqqammavugalugit tamakkiisumik taperserparput, Ilaqutariinnermut Peqqissutsimullu Ataatsimiititaliamut ingerlateqqillugu.

Imm. 59. Cannabisoliat CBD-mik (cannabidiolimik imallit aamma annerpaamik 0,2% THC-mi (tetrahydrocannabinolimik) imallit unioqqutitsinertaqanngitsumik pisiarineqarsinnaasunngornissaannut nioqqutigineqarsinnaasunngornissaannut kiisalu eqqunneqarsinnaanngornissaannut Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq, Justus Hansen, Demokraatit).

Justus Hansen siunnersuummut pingaaruteqartumut qutsavigaatsigit.

Nunatsinni inoqarfippassuarni peqqinnissaqarfiup inunnik katsorsaagasuarsinnaanera anniarnaveersaartitsinermilu tunniussinnaasai ajorsiaruinnartillugit piffissanngorpoq innuttaasunut pitsaanerusumik aqqutissiuussissalluta. Peqqinnissaqarfimmi unammilligassarpasuit ukiuni kingullerni kikkulluunniit naalakkersuisuusarneranni annertusiartuinnarsimasoq, pisariaqalersoq tassaavoq nunatsinni innuttaasut atuinissaminnut pisinnaatitaaffiisa annertusarneqarnissaat.

Peqqinnerup siuarsarnerani innuttaasut nammineq kiffaanngissuseqarlutik cannabisoliemik 0,2%-imik THC-talimmik katsorsartinnermi nakorsaataanngitsunik pinngortitali tunniussinnaasaanik atuinissaminnut kiffaanngissuseqartinneqarnissaa isumaqatigaarput.

Cannabisoliat CBD-mik aamma annerpaamik 0,2%-imik akullit inuit peqqissusaannut iluaqutaasusaaq atuisinnaanissaallu unioqqutitsinertaqanngitsumik inuiaqatigiinnut pissarsissutaasoq Inuit Ataqatigiit aqqutissiuukkusuppaat. Neriuppugut Inatsisartut partiillu

INUIT ATAQATIGIIT

Inatsisartuni



tamarmik cannabisoliap unioqqutitsinertaqaangitsumik atorreqarsinnaasunngornissaa tapersissagaat.

Ullumikkut immikkut tunniussinissamut akuersissut atorlugu Kalaallit Nunaanni cannabis nakorsaaitut nakorsanit atugassanngortissallugu periarfissaqareerpoq. Tamannali naammassorinngilarput cannabisolie nakorsat akuersiseqqaarlugit aatsaat pissarsiarineqarsinnaammat. Innuttaasut namminneerlutik kiffaanngissuseqarlutillu cannabisoliek atuisinnaalernissaannut siunnersuut taperserparput, Ilaqutariinnermut Peqqissutsimut Ataatsimiititaliamut ingerlateqqillugu.

Imm. 134. Danskit misileraanerattut ittumik nakorsat ataasiakkaat immikkut akuersissummik piniaqqaaratik nakorsaaitut akuerisaanngitsumik cannabisimik nakorsaasiillutik nakorsaanissamik periarfissaqalersillugit misileraanermik aallartitsinissamik Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq, Peter Olsen, Inuit Ataqatigiit).

Siunnersuuteqartumut Peter Olsenimut Inuit Ataqatigiit qujapput.

Peter Olsen siunnersuuteqarpoq danskit misileraanerattut ittumik nakorsat ataasiakkaat immikkut akuersissummik piniaqqaaratik nakorsaaitut akuerisaanngitsumik cannabisimik nakorsaasiillutik nakorsaanissamik periarfissaqalersillugit misileraanermik aallartitsinissamik Naalakkersuisut peqquneqarnissaannik.

Siunnersuut nunatsinni nakorsat pisinaatitaaffeqarnerisa killilersuiffigineqannginnissaannik siunertaqartoq Inuit Ataqatigiit tamakkiisumik tapersersorpaat. Nunatsinni nakorsat ulluinnarni innuttaasunik peruluttunik katsorsaaniarnerminni nakorsaatinillu atuniarnermikkut unammilligassarpassuaqareersut ullumikkornit pitsaanerusemik pisinnaatitaaffilerneqarnissaat pisariaqarpoq. Nunatsinni innuttaasut peqqissutsikkut isumassortariaqavissortut sapinngisamik pitsaanerpaamik katsorsarneqartarnissaat nakorsarneqartarnissaallu Inuit Ataqatigiit pingaartippaat.

Inuit aalajangersimasumik aamma immikkuullarilluinnartumik nappaatillit, minnerunngitsumillu nappaassuarmik kræftimik nalaataqartut nunatsinni peqqinnissaqarfiup tungaaniit ikiorserasuarneqarnissaminnik periarfissaalatsisarnerat aaqqiiviginiarlugu Naalakkersuinikkut suliniuteqartoqarnissaa pisariaqalivippoq. Inuppassuit immikkuullarissumik qaqutigoortumillu nappaateqartut peqqinnissaqarfimmi suleriaatsip pitsaasumik sullissinermikkut matussusersinnaasangikkaat tamanit naluneqanngilaq.

INUIT ATAQATIGIIT

Inatsisartuni



Innutaaqativut nappaassuarmik kræftimik nalaataqartut imaannaanngitsumik aqquusaagaqartut cannabisimik nakorsarneqarlutik pisinnaatitaaffeqarnerisa annertusaaffiginissaa qulakkeerneqartariaqartoq Inuit Ataqatigiit isumaqarput. Nappaassuarmik kræftimik nalaataqartut nunatsinniiginnarlutik nakorsaaserneqartalernissaasa periarfissaqarnerat ineriartortitsivigineqartariaqarpoq. Matumanilu siunnersuummi tunngavilersuutigineqartoq nunatsinni nakorsat immikkut akuersissummik piniaqqaaratik nakorsaaitut akuerisaanngitsumik cannabisimik nakorsaasiillutik periarfissaqalernissaat, peqqinnissaqarfiup siunissami ineriartortinneqarneranut ilapittuutaalluarsinnaasoq isumaqarpugut, siunnersuullu taperserlugu Ilaqutariinnermut Peqqissutsimut Ataatsimiititaliamut ingerlateqqillugu.